

**Malaysia Dan Filipina Disaran Teroka Kerjasama Ekonomi Di Selatan Filipina  
Bernama  
29 Oktober, 2012**

KUALA LUMPUR, 29 Okt (Bernama) -- Malaysia dan Filipina disaran meneroka kerjasama ekonomi di selatan Filipina antaranya dalam bidang perladangan, kewangan dan perlombongan dengan termeterainya perjanjian damai antara kerajaan Filipina dan Barisan Pembebasan Islam Moro (MILF) pada 15 Okt lepas.

Pengerusi Biro Antarabangsa Pertubuhan Pribumi Perkasa Malaysia (Perkasa) Datuk Mustapha Yaakub berkata kerjasama ekonomi itu juga dilihat mampu membantu pembangunan ekonomi penduduk di kawasan itu.

"Malaysia mempunyai kepakaran dan kemahiran dalam perladangan, kewangan, perlombongan dan lain-lain yang boleh diaplikasikan di selatan Filipina yang majoriti penduduknya Islam.

"Kerjasama ini memberi keuntungan dalam limpahan ekonomi kedua-dua negara di samping membela nasib masyarakat Islam di selatan Filipina seterusnya memperbaiki hidup masyarakat dibelunggu perang empat dekad itu," katanya kepada Bernama.

Kerajaan Filipina dan MILF menandatangani kerangka perjanjian damai secara rasmi bagi mengakhiri konflik lebih 40 tahun di wilayah selatan Filipina.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=705292>